



Inconnu à Relong

202

LE
HIBOV
DES
IESVITES
OPPOSE' A LA
CORNEILLE
DE CHARENTON,

*Respond au fol selon sa folie, de peur
qu'il ne s'estime estre sage.*

Prouerb. 26. v. 5.

M. DC. XXIV.

202

THE NEWBERRY
LIBRARY

(252)

F

39

,326

1624m

CORNELL

DE CHARENTON

Received of the
Library of the
University of
Chicago

M. D. XXIV



LE HIBOU DES IESVITES

opposé à la Corneille de Charenton.

NO s Aduersaires ont plus de trompettes que nous n'auons de foldats. Il n'y a si malotru parmy eux qui ne se messe d'escrire. Il n'y a si miserable escrit qui ne soit tympanisé sur le pont neuf. Ils ont les rieurs de leur costé, & on chante la Musique deuant l'Idole. Et ne plus ne moins que lors que l'on expose en veuë quelque tableau ridicule, il y a plus de fols qui s'y amusent, qu'il n'y a d'hommes sages attentifs à contempler le portraict d'un beau visage, les escrits les plus grotesques sont le passe-temps des idiots : le diable sçait qu'au son de l'Euangile doiuent tomber les murailles de Babylon : C'est pourquoy aussi-tost

qu'un fidele seruiteur de Dieu publie quelque verité, il fait du bruit de tous costez, pour l'empescher d'estre ouye, mais malgré tous ses efforts le son en sera porté iusques au bout du monde, & en fin le mensonge aura la bouche close.

Monsieur Mestrezat ayant depuis peu de iours mis en lumiere vn docte & solide traicté de la *Communion à Iesus-Christ au Sacrement de l'Eucharistie*. Nos Aduersaires s'en sont grandement émeus, & le menacent de tous costez. Et pour commencer l'escarmouche, Veron s'est aduancé avec vn sac d'iniures. Puis que ces gens orient si haut, c'est vn tesmoignage qu'ils se sentent piquez au vif: & puis qu'ils ne respondent qu'en iniures, c'est vne preuue certaine que la raison leur manque. f. Veron qui fait le bastleur auoit

peur qu'on le mescongneust, c'est pourquoy au frontispice de son admirable chef-d'œuvre, il a mis vne piece du mestier, vne marque de sa folie: Il intitule son liure *la Corneille de Charenton*. Ne plus ne moins que les enfans ont vne forme d'oyseau qu'ils esleuent en l'air pour se donner du passe-temps. Ce maistre bouffon ayant de la legereté de sa ceruelle engendré vn oyseau, tasche de le faire voller pour apprester à rire au monde: mais cét oyseau ne tient qu'à vn filet pourry qui se rompt de soy-mesme à la confusion del'oyseleur.

Cependant ie ne puis penser pourquoy cét impertinent compare M. Mestrezat à la Corneille, si ce n'est d'autant qu'il s'est attaqué à l'idolatrie de l'Eglise Romaine: car de dire qu'il n'a fait que transcri-

re les œuures d'autrui, c'est vn impudēt mensonge: Côme les yurons croient voir plusieurs Soleils, cest homme est tellement enyuré de sa passion, qui croit appercevoir plusieurs liures du tout semblables, il en voit mesme qui ne furent iamais comme le liure pretendu de M. Turretin, peut-estre qu'il veut dire de M. le Veilleux, mais il en parle comme vn aueugle des couleurs: L'esclat de la verité luy a donné dās la veuë, il en est esblouy, & la teste luy tourne: Il implore le secours du Roy, des Mareschaux de France, de l'assemblée de Charenton, il ne sçait où il en est. Pour redresser ce Docteur esgaré, nous luy soustenons qu'entrel'escriit de M. Mestrezat & ceux de nos autres Docteurs qui ont escrit sur le mesme subiect, il se trouuera nō vne identité, mais vne

conformité, & certes si nostre homme pouuoit confesser la verité, il nous aduoüeroit que c'est ce qui le fait creuer de despit, car il voudroit les voir comme Madiarites tirer l'espée l'un contre l'autre: Ils se sont tous seruis d'une mesme espée, mais ils l'ont diuersement affilée, les uns en ont trenché d'un costé, les autres de l'autre, mais tous ensemble en ont coupé les nœuds entortillez de la superstition.

Mais pour monstrier que M. Mestrezat n'a fait que tourner en François le Latin de Dominis, le sieur Veron met en auant vne preuue feriale. Il ne faut, dit-il, que lire leurs indices, il y a en Dominis *Appendices à Iustin le Martyr, appendices à Irénée, &c.* & en Mestrezat *de S. Iustin le Martyr, de S. Irénée, &c.* O le Theologien admirable! & qui se fut ia-

mais aduisé d'une telle subtilité? Dominis & M. Mestrezat s'estoient proposé vn mesme but, assauoir de monstrier que les Docteurs de l'Eglise ancienne n'ont point eu la creance de l'Eglise Romaine au poinct de l'Eucharistie, Pour paruenir à ce but, il falloit necessairement ou qu'ils confondissent l'ordre des siecles & des Docteurs qui ont vescu en iceux, ou qu'ils les examinassent d'un mesme ordre. loignez à cela que l'un & l'autre auoient vn mesme but particulier, assauoir de refuter le Cardinal du Perron, ils estoient donc obligez l'un & l'autre de suiure du Perron pas à pas, & ainsi se rencontrer en vn mesme ordre: Mais si le corps des deux liures est vne mesme chose, pourquoy est-ce que Veron qui met les indices en Parralleles, n'opposoit aussi chapitre à

tre à chapitre, ou pour le moins période à période? Certes si ce luy eust esté chose possible, il n'y eust pas manqué, mais il escript contre sa conscience, & impose d'autant plus hardiment aux lecteurs qu'il sçait, que de mille il n'y en a pas vn qui ait leu Dominis, & que peu se travailleront à examiner son liure. Que tout amateur de verité prenne la peine de confronter les escrits de part & d'autre, & il recognoistra combien cet imposteur est impudent.

Il n'est pas moins ridicule de croire que ce seroit vn opprobre à vn des nostres d'auoir imité de Dominis, en ce qu'il a fait de bien : car selon le precepte de l'Apostre, en la premiere aux Thessaloniens chapitre 5. Il faut esprouuer toutes choses, & retenir ce qui est bon:

Ce miserable homme ayant plus de science que de conscience, apres auoir esté quelque temps parmy nous, est retourné comme le chié à son vomissemēt, & la truye lauée au borbier ayāt aymé ce présent siecle, il nous a abandonné. Cepédant il a frappé dans le sein de la grande paillarde, & la playe n'en fera iamais guerie. Il est retourné en Egypte, mais ses œuures plus precieuses que l'or sont demeurées pour ornemēt au tabernacle, Ses escrits viuront apres luy, & luy feront son procès au iour du iugement: Nous auons esté enrichis de ses despoüilles, & les conseruerons comme vn thresor à la posterité. Quoy que ce soient les armes d'un Goliath vaincu, si est-ce qu'elles seruiron à iamais de trophées à l'Eglise, elles demeureront appenduës en la maison de Dieu, &

les oincts du Seigneur n'auront point de honte de les employer à combattre le mensonge.

Or encore que Veron ayt sans raison & contre la verité accusé M. Mestrezat de s'estre paré des plumes d'autrui, si est-ce qu'il n'a que faire de craindre vne recrimination de pareille nature. Nous n'auons garde de dire qu'il a inferé en ses escrits le labeur d'autrui, car personne auant luy ne s'est aduisé de si mal faire. Pour trouuer ce Veron, il le faut chercher dedans sa propre escume: car tout ce qu'il dit n'est qu'une rapsodie de ses autres escrits: Ce sont des choux recuits qui font mal au cœur. Cét homme ne pouuant acquerir de la gloire par la qualité de ses escrits tasche de se rendre recommandable par la quantité d'iceux: Il croit auoir affaire à des per-

sonnes qui conteront ses paroles au lieu de peser ses raisons. C'est pourquoy il tasche de remplir le monde de ses beaux liures, & les recommande au profne. C'est vn homme preuoyant, il a eu peur que les beurrieres n'eussent faute de papier : Si elles sont bien conseillées, elles deputerôt vers luy pour l'encourager à continuer de bien en mieux.

Or comme nous aurions tort de cōparer Veron à la Corneille d'Homere, aussi d'autre costé sommes-nous fondez en tres bonne raison, de l'appeller *le Hibou des Iesuites*, Car ne plus ne moins que les autres oyseaux ne souffrent point le Hibou en leur compagnie, les Iesuites n'ôt peu souffrir Veron, ils l'ont banny de leur societé, tellement que de Iesuite il est deuenu Prestre seculier.

Cest compagnie qui n'est point

destituée de la prudence de ce siècle, a preueu les équipées de Veron, & n'a point voulu estre chargée de son opprobre, il leur a semblé trop ridicule pour vn Iesuite. 2. Adioustez à cela que le Hibou ne peut supporter la lumiere du Soleil, aussi Veron ne peut souffrir l'esclat de la verité; Il se cache dans les tenebres du mensonge. 3. Le Hibou est vn oyseau de mauuais augure, personne ne se plaist à le sçauoir sur sa maison: Si quelqu'un prend plaisir en la compagnie de Veron, dites assurement qu'il chemine en tenebres, il est près de tomber dans le sepulchre de l'erreur: car à ceux qui ayment la pieté & la vertu, c'est vn personnage tellement odieux & insupportable, que d'oresnauant on dira *importun cōme Veron*. 4. Il n'y a point d'oyseau plus puant que le Hibou:

tout ce qui sort de la bouche de
 Veron est pure infection, Bien pu-
 nais qui ne le sent. 5. Il n'y a point
 de cry plus desagreable que celui
 du Hibou : Iamais homme ne parla
 avec moins d'éloquence que Ve-
 ron : Il n'y a rien de plus fade que
 ses liures, les Secretaires des Saints
 Innocents escriuent de meilleure
 grace. 6. On dit qu'un iour l'Ai-
 gle proposa en plein Conseil de re-
 cevoir en sa Cour les petits des oy-
 seaux qui se trouueroient de plus
 grande beauté : chaque oyseau vou-
 loit presenter les siens, mais le Hi-
 bou dit à l'Aigle, ma Princesse reço-
 y les miens qui surpassent tous les au-
 tres en beauté : l'Aigle demande de
 quelle beauté sont ses petits ? & le
 Hibou respond, d'une beauté sem-
 blable à la mienne, & alors tous les
 autres oyseaux se prirent à rire de-

mesurément. Il semble que ceste fable ayt esté composée expressément pour représenter Veron qui prend la hardiesse de presenter ses escrits à l'Aigle de la France, & les croit parfaitement beaux, pour ce qu'ils portent son plumage.

Que si vous me demandez quel est le plumage de ce Hibou: le respondons qu'il est composé de ces dix plumes principales, l'ignorance, l'impertinence, l'insolence, l'imposture, l'impudence, le mensonge, la iactance, les iniures, la bouffonnerie & l'impieté.

Son ignorance est palpable, il se melle d'escrire & n'entend pas l'estat des controuerses: il estime que nous croyons ne receuoir en la Cene que des figures, & que nostre vnion à Iesus-Christ ne consiste qu'en imagination: & d'autant que

M^r Mestrezat conformément à la doctrine de toutes nos Eglises Reformées enseigne en son traité, que les signes ne sont pas seulement figuratifs, mais aussi exhibitifs de la grace de Dieu, & qu'approchans de la Table du Seigneur avec foy & repentance nous receuons non seulement le pain & le vin, mais aussi le Corps & le Sang de Iesus-Christ, dont nos ames sont nourries spirituellement en l'esperance de la vie éternelle, d'autant (disie) que ledit Sieur enseigne ces choses, il estime qu'il est Heresiarque Preuostable en France, & qu'il doit estre chastié par ceux de son party. Quoy Docteur! Est-ce estre Heresiarque d'enseigner vne doctrine receuë en l'Eglise, il y a plus de seize cens ans? est-ce vn crime Preuostable de dire que Iesus-Christ nous

nous est exhibé en la Cene ? Enseigner la Communion à Iesus Christ, est-ce vn sujet pour exclurre quelqu'un de la Communion des fideles ? Certes si Veron attend à rentrer en la Compagnie des Iesuittes, que M. Mestrezat soit abandonné de son party, il est en danger de ne porter iamais agraffe.

On ne vid iamais de telles impertinences que celles de Veron: Ceux qui tiennent le milieu entre deux opinions par vne nouuelle Rhetorique, il les appelle *Hermaphrodites en Religion*: Si ces paroles estoient de meilleure grace, nous aurions iuste sujet de les appliquer à Veron, qui fait ensemble le mestier de basteleur & de Theologien. Pensant auoir trouué la febve au gasteau, il promet d'immoler vne Corneille à la rísee publique, & cependant il

conuie le Roy au Sacrifice. Rap-
portez icy le tiltre ferial qu'il met
en sa methode, *Responſe generale à
tous les liures de Calvin, Beze, du Pleſ-
ſis, Riuet, Kemnitius, Vorſtius: aux
Confessions d'Ausbourg, de Saxe, d'An-
gleterre, & à tous les liures & pref-
ches des MINISTRES, preſens &
futurs.* Il deuoit pluſtoſt dire, reſ-
ponſe à ce qui n'a point eſté eſcrit,
& qui ne le ſera iamais, & il euſt
mieux rencontré.

Son insolence eſt toute manife-
ſte, car à vn liure ſerieux plein de
doctrine & de lecture, il oppoſe vn
eſcrit ridicule, où il ne parle que de
Corneilles & de Lapreaux, Digne
certes de ſe cacher dans le clapied, ſi
ce n'eſt qu'il ayme mieux preſcher
aux Hiboux & aux Verons à l'imi-
tation de ſainct François qui preſ-
choit aux oyſeaux & aux poiſſons

qui l'escoutoient en vn profond silence.

L'imposture luy est ordinaire, car il se trauestit sans cesse, & comme vn Cameleon & vn autre Prothée il prend toutes sortes de formes, En vn lieu c'est le Pere Veron, en vn autre c'est le seigneur de la Roche, tãtost il paroist en Prestre, tantost en Gentilhomme, tantost en Docteur, tantost en Solliciteur de procès, mais tousiours en baladin. Son imposture est descouuerte, les enfans le mōstrent au doigt. Rodant de tous costez il pensoit estre receu cōme vn nouuel Apostre, mais on a recognu que c'est vn carabin de fortune, vn enfant perdu, qui va par tout attaquer par escarmouches, mais qui iamais ne liure le combat, On luy fait porter la marotte comme au plus insensé.

Son impudence est sans exemple, il se fourre par tout sans y estre appelé, mesmement és maisons des Grands, dont quelques-vns ennuyez de son importunité insolente ont esté contrains de le chasser avec menace.

Le mensonge luy est tourné en coustume, à l'ouuerture de ses lettres il se fait recognoistre enfant de celuy qui est menteur & meurtrier dès le commencement. Si on le croit, il ne void point d'ennemy qu'il ne terrasse, il cōuertit les ames à milliers, & des Prouinces entières luy seruent de trophées. S'il peut faire parade d'un gibier acheté, il fait accroire que ce n'est que la moitié des millions qu'il a pris à sa pîpée. Il croit que celuy qui vient de loing a permission de mentir : En Gascogne il publie ses victoires de

l'Isle de France, & en France les victoires de Gascongne, Les vnes & les autres sont aussi veritables que ce qu'on publioit n'aguères de huit mille personnes de S. Iean d'Angely conuerties à la Religion Romaine, mais c'est assez qu'un mensonge soit creu vingt-quatre heures.

De mesme farine est-ce qu'il recite des pretenduës victoires qu'il a remportées sur les Pasteurs de ceste Eglise, il est entré ridiculement en leurs maisons, mais il y a perdu son procès, & n'en a remporté que confusion, tesmoins en soient les assistans & ses propres signatures, & la closture de la dernière conférence qu'il a eu avec M. Mestrezat. Pour nous persuader le contraire, il faudroit que Veron eust l'éloquence de Pericles, duquel Thucydide disoit à Archidamus Roy de

Lacedemone. Quand iel'ay ietté par terre en luctant, il sçait si bien dire en le niant, qu'il fait croire aux assistans qu'il n'est point tombé, & leur persuade le contraire de ce qu'ils ont veu. Certes cét homme est trop peu disert pour nous persuader ses songes, mais il a assez de vanité pour les croire : A force de publier ses mensonges, il croit que ce sont des veritez.

Sa iactance est insupportable, il rompt la teste à tout le monde de sa pretenduë methode, & s'en vante comme s'il en estoit l'autheur, Cependant il la tient de feu Gonthery Iesuite, qui s'en est seruy il y a plusieurs années. Methode tellement ridicule, qu'il n'y a crocheteur, ny chambriere qui dedans vn quart d'heure ne la puisse sçauoir aussi bié que Veron, Encore veux-je croire

qu'ils disputeroient de meilleure grace, & qu'ils auroient honte de tenir leur teste à deux mains, d'escumer de la bouche, de crier sans cesse comme Veron, & de repeter cent fois vne mesme chose de peur qu'on ne l'oublie: mais ils ne se ioient pas si capables de se glorifier insollement apres auoir esté confus comme Veron. Ce grand bauard a eu tant de fois la bouche close, il a tant de fois esté chargé de honte, que c'est vn opprobre parmy nous de disputer cōtre Verō, Tesmoins soient de sa confusion ceux d'entre Messieurs de la Cour du Parlement de Roüen, qui en la conference d'entre luy & M. de Langle, l'ont veu durāt l'espace d'vne heure muet comme vn Veron. Cependant il se fait tout blanc de son espée, & nous menasse de ses gros li-

ures les montagnes enfanteront , mais
ce sera d'une ridicule souris.

Qui veut sçauoir des injures, il en
apprendra plus de Veron , que de
toutes les harangeres de Paris : Il
merite de passer parmy elles vne so-
lennelle maistrise , Elles luy doiuent
vne couronne de laurier, toutesfois
il vaut mieux qu'elle soit de Cypres,
car les victoires sont funebres.

Au moins si ne pouuant contre-
faire le serieux il auoit de la grace à
faire le bouffon, mais il n'y a iouëur
de farces qui n'ayt les rencontres
plus plaisantes que Veron. Ce qui
est de plus horrible , est qu'il melle
ses bouffonnies avec les mysteres
de la Religion. Homme profane, si
tu ne preuiens les Iugemens de
Dieu par repentance , tes ris se chā-
geront en pleurs & grincemens de
dents!

Ses

Ses ris profanes sont vne preuve de son impieté, en toutes ses procédures il ne fait paroistre ny conscience, ny crainte de Dieu. Quand on luy en parle, il s'en mocque; Il feroit plustost dix mille Athées qu'un bon Chrestien, car sa pretendue methode renuerse toute la certitude de l'Euangile: Choisissiez tel article de la foy Chrestienne qu'il vous plaira, si on reçoit la methode de Veron, vous ne le prouuez iamais par l'Escripture: Car encore que le sens y soit, s'il y manque vne syllabe, Veron crierà que la preuve est deffectueuse. Dieu luy apprendra vn iour à argumenter d'une autre sorte: car encore qu'il n'y ayt point en la parole de Dieu, Veron ne sera point menteur ny idolatre. si est-ce qu'il est escrit en general, que les menteurs & les

idolâtres n'hériteront point le Royaume de Dieu. Il fait mauuais se iouir à son Maistre, & la temerité dos hommes se tourne en frayeur; C'est chose horrible de tomber entre les mains du Dieu viuant

Tel estant le plumage de ce pauvre Hibou, c'est vn prodige de le voir approcher si près du Soleil, & se ietter aux pieds du Roy, Sa Majesté auroit biē faite de passe-temps, si elle en cherchoit en ce ridicule oyseau.

Les chasses de sadite Majesté ne luy coustent pas si cher, que ce Hibou luy veut vendre son cry: car notez que sous pretexte de donner plaisir au Roy, il traueille pour son profit, Le but de son Epistre est de tirer de l'argent, & que le Roy fasse vn fonds pour defraier quarante ou cinquante hommes comme luy.

On pensoit que le but de Veró fut le biẽ de l'Eglise, & voicy qu'il presche pour le ventre; & sous pretexte d'edifier la maison de Dieu, il tasche de poser le fondement de sa cuisine à la mode des Moynes qui bastissent leurs maisons auant que de bastir leurs Temples. Cepẽdant le sieur Veron s'est grandemẽt oublié, car il deuoit aussi demander au Roy permissiõ de couper du bois en ses forests, pour faire des Theatres & des boüetes à onguent, Mais peut-estre qu' auparauãt il veut faire son cours sous Tabarin.

Veritablement ce seroit chose bien honorable de voir vne cinquantaine de Charlatans tracasser par le Royaume aux despens du Roy! Vne si grande nuée de Hiboux feroit peur au monde, & les peuples les prendroient pour pre-

sage de pestilence & de mortalité.
 Mais sa Majesté est occupée à cho-
 ses beaucoup plus grandes qu'à or-
 donner de la saulce d'un Veron, ou
 de la cage d'un Hiboux. Côme les
 Iesuites se sont bien trouuez de l'a-
 uoir chassé de leur Compagnie, ce
 seroit vn bon-heur à cét Estat si on
 le releguoit en Babylone, lieu desti-
 né aux Chathuans. Ce que nous di-
 sons non pour crainte des Missions
 que Veron brigue pour soy & ses
 compagnons : Car si nous estions
 gés à recercher des voyes obliques,
 & que par des Ministres de Satan
 nous voulussions aduācer le regne
 de IesusChrist, on se cottiheroit par-
 my nous pour entretenir telles gés.
 Quand nous aurions esté par tout
 le monde pour cercher vn homme
 propre à exposer l'Eglise Romaine
 en risée, nous n'en sçaurions trou-

uer vn plus propre que Veron.

Mais afin que l'on ne pense que nous ayons pris à tasche de blasmer tout ce qui procede de Veron, j'aduoue que parmy ses esgaremens il y a de plaisantes rencontres: Quand il veut il approprie les choses à leur poinct. Il a raison de demander au Roy permission de prescher soubs les halles, car c'est le lieu où le peuple s'assemble pour ouyr les charlatans de village: il a raison de vouloir hanter les Cimetieres, car c'est la retraite des Hiboux. Mais il est encore mieux fondé quād il demande part à l'argent duquel on entretient les cheuaux & les chiens, puis qu'il est brutal comme vn cheual, & qu'il abbaye comme vn chien.

Ie poursuuirois plus auant à depeindre ce Hibou, mais ie crains de profaner ma plume, & d'abuser de

la patience du Lecteur. Pour conclure ce propos, si ce Hibou ne charge son cry, si Veron ne reforme sa façon d'escrire insolente & iniurieuse, nous le laisserons enroüer, vomir ses injures, & se plonger en son ordure: Mais si par miracle il luy pouuoit arriuer de faire chose qui vaille, ou qu'un plus habille que luy mette la main à la plume, M. Mestrezat a le courage trop noble, & soutient vne trop bonne cause pour demeurer sans repartie.

En la bouche du fol est la verge d'orgueil, mais chaque mot des sages les contrregarde. Pr. 14.3.







